



Kuvishwa Haki ya Kristo

Toeni dhabihu za haki, Na kumtumaini Bwana.—Zaburi 4:5.

Mtume Paulo alitambua udhaifu wake, inaonekana wazi hakutumainia nguvu zake mwenyewe. Akizungumzia sheria, anasema, “Ile amri iletayo uzima ya kuwa kwangu mimi ilileta mauti.” Alikuwa ametumiainia matendo ya sheria. Anasema, akizungumzia maisha yake mwenyewe ya nje, kwamba kwa “habari ya kuishika sheria” hakuwa na “hatia”; naye aliweka tumaini lake kwenye haki yake mwenyewe. Lakini wakati kioo cha sheria kiliposimamishwa mbele yake, naye akajiona kwa namna ambayo Mungu anamwona, akiwa amejaa makosa, akiwa amechafuliwa na dhambi, alilia, “Ole wangu, maskini mimi! Ni nani atakayeniokoa na mwili huu wa mauti?”

Mtume Paulo alimtaazama Mwana Kondoo wa Mungu azichukuaye dhambi za ulimwengu. Alisikia sauti ya Kristo ikisema, “Mimi ndimi njia, na kweli, na uzima; mtu haji kwa Baba, ila kwa njia ya mimi.” Alikusudia kujinufaisha kwa faida ya neema inayookoa, kufa katika makosa na dhambi, hatia yake kuoshwa kwa damu ya Kristo, kuvishwa kwa haki ya Kristo, kuwa tawi kwenye Mzabibu ulio hai. Yeye alitembea na Kristo, naye Yesu akawa kwake – sio tu sehemu ya wokovu, wakati matendo yake mema yakiwa ni sehemu nyingine pale, bali – yote katika yote, wa kwanza na wa mwisho na aliye bora katika kila kitu. Alikuwa na imani ambayo uhai wake unatoka kwa Kristo, iliyomwezesha kupatanisha maisha yake na yale ya kielelezo cha mbinguni. Imani hii haidai chochote kwa ajili yake aliye nayo kwa sababu ya haki yake, bali inadai kila kitu kwa sababu ya haki ya Kristo.

Tabia ya Kristo inafafanuliwa kwenye injili. Kama alivyokuwa akishuka hatua kwa hatua kutoka kwenye kiti Chake cha enzi, Uungu Wake ulifunikwa katika ubinadamu; lakini katika miujiza Yake, mafundisho Yake, mateso Yake, kusalitiwa Kwake, kukejeliwa Kwake, kesi Yake, kufa Kwake kwa kusulubishwa, kaburi Lake kati ya matajiri, kufufuka Kwake, siku Zake 40 duniani, kupaa Kwake, ushindi Wake, ukuhani Wake, ni hazina Zake zisizoisha za hekima, ambazo zimerekodiwa kwa ajili yetu kutokana na uvuvio wa Neno la Mungu. Maji ya uzima bado yanatiririka vijito vilivyojaa vya wokovu. Siri za ukombozi, upatanifu wa uungu na ubinadamu katika Kristo, hali Yake ya Mungu kuwa katika mwili wa mwanadamu, kafara Yake, upatanisho Wake vitatosha kwa ajili ya kuridhisha akili zetu, mioyo yetu, ndimi zetu, na kalamu zetu kwa mada zifaazo kutafakariwa na dhihirisho kuu katika wakati wote; na wakati hautatosha kumaliza kueleza maajabu ya wokovu, lakini milele, Kristo atakuwa sayansi na wimbo wa nafsi itakayokuwa imekombolewa. Maendeleo mapya ya ukamilifu na utukufu wa Mungu katika uso wa Yesu Kristo yataidumu kufunuliwa milele. Na sasa lazima kuwe na tegemeo kamili katika sifa na neema Yake; lazima kuwe na kutoiamini nafsi, na kuwa na imani hai ndani Yake (The Signs of the Times, Novemba 24, 1890).